


PARREZ PLOUGON

## GUERZ SANT FIAKR

WAR DON : *Sainte Religion.*

*O Sant Fiakr, hon Tad !  
 Selaouit hep dale  
 Pedenn ho pugale.  
 O Sant Fiakr, hon Tad !  
 Eus lein ar baradoz,  
 Skuilhit warnomp bennoz.  
 Plougon ho kar ato  
 Ha laouen a gano  
 Meuleudi d'hoc'h hano (ter).*



1

Ganet e bro ar Skos, ha mab hena d'ar roue,  
 Gant Konan, eskop Sor, c'houi 'voe skoliet abred :  
 Gantan c'houi a zeskas anaout ha karout Doue,  
 Ha disprizout a-grenn plijaduriou ar bed.

2

Evit pellaat buan diouz an enoriou kaera,  
 Eus a balez ho tad c'houi a dec'has e-kuz,  
 Hag a zeuas e Frans gant hoc'h c'hoar santel, Sira,  
 Da veva sioul ha paour, unanet gant Jezuz.

3

Eürus ar vugale a gav, e-tal o c'havel,  
 Mistri gouiziek ha fur da urzia o c'halon :  
 Ne vint ket touellet gant moged ha gant avel ;  
 Poania 'raint da c'hounit an eürusted gwirion.

4

Sant Faron, eskop Mô, ken mat, ken anavezet,  
 A rôas d'eoc'h ho taou hervez ho menozioù :  
 Sira en em glozas 'n'eul leandi gwerc'hezad,  
 Ha c'houi en eul lochenn, e 'dounder ar c'hoajou

5

Eno c'houi a renas an dalvoudusa buhez,  
 E-giz ma lavar d'eomp skridou an amzer goz :  
 Ar bedenn, al labour, gant pinijenn didruez,  
 Setu hoc'h oberou hag en deiz hag en noz.

6

Eno c'houi a savas eur chapelig d'ar Werc'hez :  
 Rak d'houi a gare kalz an Itron Varia.  
 Eno burzudou bras a vrudas ho santelez ;  
 Eno e voe gwelet e karec'h ho nesa.

7

Evit kaout peadra da rei d'an dud reuzeudik,  
C'houi 'labouras douar e-kichen ho lochenn ;  
N'ho poa damant ebet ouz ho taouarn kizidik,  
Ha diouz ho tal seder e strinke ar c'houezenn.

8

Faron a rôas d'eoc'h, da greski ho liorzig,  
An dachenn a c'helljec'h da gloza en eun de :  
Raktal, war an douar, c'houi a ruzas eur vazig,  
Ha, dre ma tremenec'h, eun and a zigore.

9

Piou a laro pet paour, ouz ho taolig azezet,  
O deus torret o naon ha kavet peoc'h ha joa ?  
Piou 'laro pet klanvour o deus kavet ar yec'hed,  
Dindan ho torn santel savet d'o benniga ?

10

Ho korf a voe taget gant eur c'hlenved donjerus,  
Pa zeuas tud ho pro d'ho koulenn da roue :  
A-vec'h ma oant tec'het, -- o tra meurbet burzudus ! --  
Ho korf, koulz ha biskoaz, a voe yac'h adarre !

11

O këntel dudius ! c'houi, Fiakr, mab eur roue,  
Adal ho yaouankiz, ho peus klasket ar boan,  
Hag, evit kemer lod e Pasion Mab Doue,  
Ho peus kastizet rust ho korf tener ha glan.

12

Ho puhez ken santel, ken leun a binijennou,  
D'an dud a blijadur didroidell a lavar :  
Pinienn ! pinienn ! rak, evit mont d'an nenvou,  
Eo ret d'ar bec'herien tremen dre ar C'halvar.

13

C'houi 'zo bet labourer, eul labourer galloudek,  
Ha diouz c'houezenn ho tal ho peus bet ho para :  
Aman ez eus ive labourerien kalonek :  
Warno savit ho torn evit o benniga.

14

Aman 'zo tud a vor ; o micher a zo kalet :  
Stourm nerzus a rankont ouz konnar an tarziou :  
Pedit, o Sant Fiakr ! evit na vint ket kollet,  
Ha na vo en o zi na trubuilh na daelou.

15

Grit d'eomp, Tad benniget, derc'hel da feiz hon Tadou  
Ha heulia penn-da-benn gourc'hemennou Jezuz :  
Neuze, goude tremen dre an draonienn a ganvou,  
Ganeoc'h er baradoz, ni 'gano dudius. BASTIEN.

AOTRE DA VOULLA : Kemper, 20 a viz Eost 1931.

P. JONCOUR, Vikel vras.